

OLA

PULETINI A'OGA



7 AUKUSO 2023 ~ Lomiga 12 ~ Upega Tafailagi: www.ola888.com ~ Telefoni: 0210364322 ~ Tuatusi: ola.niupac@gmail.com ~ evaleon.books@gmail.com ~ NIUPAC Publication

Otootoga

AUTASI E UNA'I TAMAOAIGA FANUA

O le vaiaso ua mavae na saina ai se maliega i le va o le lunivesite a Kenetaperi ma ni iunivesite auliuli a tagata o le eleele mai Kanata. I lea maliega o le a galulue faatasi ai a'oga e tolu i le sini o le una'ia o atina'e faaletamaoiga e fa'aoga ai tomai ma le poto o i tagata na mua i le fanua. Ua iloa le faia'e o lea tamaoiga i le lalolagi e taulamua ai nei a'oga i Kanata. Ua 'autasi foi a'oga e tolu i pepa e mafai ona ofoina faatasi mo lea fuafuaga tusaafia.

VALA'AU E AVEESE LE FALEOLOA

O le vaiaso ua tuana'i na savalia ai le ala e matua i Aukilani Sisifo, e faailoa la latou tete'e i se pisinisi e faatau ai le tapaa-e poo le veipa i o latou vaifanua. Mafua le tete'e ona o le tulaga tulata o lenei faleoloa i se a'oga. To'atele fanau a'oga e uia lona lumafale, o le popolega lea o matua. E aga'i fo'i le faasea i le malo atoa le fono a Aukilani i le le manatu i fanau. Faatasi ma matua le pule o le a'oga na 'autasi i le vala'au e tapuni lenei faleoloa.

FALEPUIPUI I LE LE POPOI

E lima ma le 'afa tausaga i le to'ese ua faasala ai le sa pule i le Deep Green Bush, o se a'oga i Aukilani. O lana solitulafono, o le fa'aoolima mataga i se teine laitiiti sa i lalo o lana vaaiga. Na faafiti o ia ina ua molia ae na maumaututu molimau, ma tula'i mai ai le faaiuga a le faamasinoga. Na poloa'iina foi le tusia o lona suafa i le 'api o e faia ia solitulafono i fanau. O Joseph Moncarz o se tagatanuu Amerika na ulufale mai ma faatu lana lava a'oga.



LALELEI MAI SAUTE: Le Miss Samoa Niu Sila fou ua faapaleina mo le 2023-2024, Cherish Manaia mai le aai o Kalaiesetete. Filifilia mai le to'alima pito i luga, o ia se tamaitai faigaluega i luga o vaalele i le tautuina o pasese. O le a sauni atu i le tauvaga tele i Apia mo le sailia o le Miss Samoa aoao 2023-24

Atoa Aotearoa i sui tauva tauvaga FAGASA

Mai saute mamao i Otepoti Tanetini e aulia le si'ui o le Faga o Manukau, o le atoaga lena o le si'osi'omaga fanua o le a affio mai ai le mamalu o ona sui tauva i lana tauvaga o le 2023.

O le aso ua atofa, Aso Tofi, 10 Aukuso, ua togia e faataunuu ai i Kalaiesetete. O le maota o feiloa'i Ekalesia Perepereane, Saint Paul's Trinity, e faatino ai. Amata i le taeao, e tasi le aso o le faamoemoe.

I le tauvaga o lenei tausaga, e 47 le aofa'i o sui tauva, mai le tausaga 5 e aulia le 13. E fitu a'oga mai Aukilani, tasi mai Palmerston North, tasi mai Tanetini, ono mai Kalaiesetete, ma le tasi mai Ashburton. O suafa nei o sui tauva:

- Tausaga 5:
 - Lepupa Ai'i
 - Emily Isaako
 - Faith Lavi Mino
 - Blessing Ripine
 - Sharleen Bella Vai
 - Jubilee Siatu'u
 - Irene Herman
 - Robert Matafeo
 - Tausaga 6:
 - Matiana Tufuga Alomau
 - David Auvele
 - Arenna Eli
 - Rosemarie Gatoloai
 - Dulcieteria Sam-Ling
 - Tahmai Tavai So'o

- Tishanna Muavae
- Junior Matafeo
- Marybeth Matagi
- Tausaga 7:
 - Irene Aiatia
 - Margaret Kalolo
 - Amymatilda Lafaele
 - Herman Lamositele
 - Opetaia Maugaotega
 - AJ Fili
 - Tausaga 8:
 - Charisa Elia-Talisau
 - Emmanuel Emou-Tupai
 - Easter Mata'utia
 - Saralei Mareko

- Penani Penani
- Faith Fua Paulo Fetoa'i
- Debra Utuvai
- Tausaga 9:
 - Tina Talione Vasa
 - Seioriana Fareti
 - Sarahfina Gali
 - Tina Manu
 - Tausaga 10:
 - Faai'u Pua Paulo Fetoa'i
 - Jj Mealoi Tupa
 - Caziah Gali
 - Tausaga 11:

- Etuale Lautasi
- Lua Talauega
- Derryan Mareko
- Sili Manu
- Tausaga 12:
 - Atioka Talimatasi
 - Moa Sakaria Tuiloma
 - Tavita Tu'u
 - Tausaga 13:
 - Moni Avia
 - Sarah Fo'i
 - Faafetai Mapuilesua



E maua se atoaga o le polokalame i luga o le upega tafailagi a le FAGASA Inc. O le tatalo a sui uma o le faalapotopotoga, ia avatu i ai le soifua i lea aso. Manuia fo'i tapenaga a sui tauva.



TALA A'OGA I AOTEAROA:

Fesaua'i faalau o le upega fagota a faia'oga Pasefika i le UC Kalaiesetete

O le ata o le upega fagota ma ona faalau, e fagota i le po ae talatala i le ao, o se tasi faatusa sa talanoaina i le faasoa faitele a faia'oga o le UC i Kalaiesetete, Aso Toona'i na se'i mavae.

E 20 le aofa'i o le vasega o sui auai sa faia le talatalaga, aofia ai tama a le eleele, ma Samoa foi, o sui i latou o faiganuu Pasefika ta'itasi.

O lenei vasega o faia'oga o loo galulue i a'oga a Kalaiesetete, ae o loo fa'aaauu pea le taumafai e faalelei tomai mo le faiva. Ua mae'a tusipasi muamua a ua manatu e si'i le matālalaga i le su'eina o le tusi lona lua.

Pei ona saunoa se sui o le vasega, e 'auga le naunau i le faaleleia o nisi vaega o le tautua. Mo se faata'ita'iga, ia maua'a i le iloa o le fa'aaogaga o su'esu'ega ma faaiuga e ta'ialaina ai le faiva. E le gata i lea, a o le faafesoota'iga lelei o le mau ma le faatinoga.

E iai le pepa lenei, saunoa le alii faia'oga ia Lealii'e Tufulasi Taleni, e taua tele lea fesoota'iga o mea e lua. Aemaise lava o mau poo tofa manino faa-Pasefika ua iloa le aoga mo le a'oa'oina o a tatou fanau i Aotearoa.

Ma i le saga faamalosi o lona moliga, o le ala lea o le vala'aulia o nisi o susuga. E iai le Aso Toonai na se'i mavae, na faasoa ai ni faia'oga se to'atolu.

Muamua, Ruta McKenzie o le Core Education, i lana folasaga o atagalua faa-Pasefika o loo aoga tele i lana galuega, ae faapea foi le SAASIA o loo galue ai. O le fe'au, e maua ia tatou muagagana le 'oa faatofa manino e mamanu ai atagalua ma faavaa e atia'e ai aga o faatinoga.

O Dr Saili Aukuso, sa 'auga lana faasoa i lana faavaagalua sa limata'ita'iina ai lana su'esu'ega



Susuga i faia'oga ma malo i le saoluma, faapea se vaega o le vasega sa auai, o isi sa a'o'oga mai i le Zoom

i le literasi Samoa. Sailiemanu o le ata nono mai i le natura fanua e felagolagoma'i vaega uma. E molia le fe'au o le taua o le le vavae'esea o i tatou mai o tatou si'osi'omaga o tu ma aga ma gagana. Ia tulimata'i le ata lapo'a o se foafoaga o itutino e fefaamoemoea'i ma felagolagoma'i.

O le faasoa a Dr Levi Tavita o lena i lana su'esu'ega sa fai i le pule Samoa ma ana faiā i totonu o Samoa. Sa talanoa foi i le uiga o le va fetausia'i e mamafi ai upu o na faiā.

O le 'auga o le faasoa, ina tilotilo toto'a le pule i le mau tauave ma lona tino mai i nei tupulaga. Talu ai e sui pea le taimi ma faiga, e ao ai ona liuliu pea le tofa, fua i ai se tapenaga tausafia.

A aotele faasoa, e tofu se atagalua ma sona taua ma se sao i le tapenaga. Sa iloa foi le

fesaua'i tonu o faalau faa-Pasefika e tele, ui ina e foliga eseese ae aga tutusa lava. O le Talanoa i le faalau faka-Tonga e tutusa ai ma isi motu i lona uiga o se gaioiga i le va tapuia. Ae iloga lona talatalaina e Samoa, i lana auala o le faafaletui ma le aga soalaupule, ma saga malosi ai le upega fagota.

Saunoa Lealii'e, o le sini o le pepa ina faamausali le silafia i le faiva ma lona uiga, ia mafatotoga i le mau ma le tofa, e ave ai le faamua ia tatou lava ata ma tofa manino.

Talu ona ofoina le pepa, ua iloa le apoina e faia'oga e le o ni Pasefika. Viia foi lona aoga mo latou e fia iloa atili lalolagi o fanau Pasefika i Aotearoa. Faatasi ma Taleni lona soa faia'oga, Dr Richard Manning, ua loa foi i le faiva.

Faitau piliona tala le ofo a le malo e faafo'i ai faia'oga i potua'oga

Ua tali le malo i faia'oga i la latou valaau i se siitaga lelei o latou totogi, i se ofo e faitau piliona. E \$4.4 piliona ua ofoina atu e pei ona faailoa e le minisita o a'oga.

Ua faailoa foi le taliaina o lea ofo e le asosi a faia'oga, PPTA.

E pei ona silafia, sa fa'aaauu pea le tete'e a faia'oga a'oga maualuluga, ina ua latou te'ena le ofo tuai. Ona toe faase'e atu lea le mataupu i se pule tuma'oti e vasagaina, na latou lagolagoina le 14.5 pasene e siitia ai totogi faavae, e faasafua i faia'oga uma. O se faasiliga lea e \$700 miliona, i le nā sa ulua'i togia i le tala o le tupe, mo totogi o faia'oga.

O le 'afa o le tupe na maua mai lea i le toe fetuuna'iga o le faasoa, a o le isi 'afa e totogi i le paketi o le tausaga a sau. O se fuafuaga na faitioina e le Itu Agai.

I lenei ofo fou o le a siitia ai le totogi o le faia'oga fou mai le \$55,948 i le \$64,082, a o i latou i le pito i luga e mai le \$90,000 i le \$103,085.

Mo e i le pito i luga o le fua, e 36 pasene ua faaleleia ai o latou totogi talu le 2017 na tumalo ai le Leipa. Mo faia'oga amata, e 23.5 pasene.



Sa talitalia ma talosia, e o'o lava i le fanau a'oga sa auai foi i le finauga, e pei ona molimau le ata o i luga

O lenei foi suiga i le tapulaa maualuga o le a aafia ai tapulaa amata ma le tulagalua. Talu ai aiaiga faaletulafono o le tausisia o se fuataga tutusa i tapulaa uma, e mautinoa e ono iai ni isi faaleleiga mo le lua i le lumana'i. Ae mo matua, o le agaga faafetai ina ua ta'oto i lagotonu lenei

mataupu fita. E lei mamao atu le saofaga a le malo mo iunivesite, \$128 miliona, ua faasoina ai galuega a nisi semanu e maumau.

Ona o le siitaga, ua taofia ai nisi o poroketi ma galuega a le matagaluega sa fuafua, ina ua ave le faamuamua i totogi o le 'aufaigaluega.

TALA A'OGA I AOTEAROA

15 pasene fanau i'u mai e leai ni tusipasi



O nisi o taulagalaga i pulega taua'oga e afua mai i faiga faavae a faigamalo, e manatu o loo ia i latou le togafiti faavavega e sui ai ausiga mo fanau uma; e iai le 'charter school' a le National, ma isi foi i Aotearoa

Fai mai se ripoti fou a le Matagaluega, e 15 pasene o fanau e i'u mai i kolisi a le atunuu e leai ni tusipasi o le NCEA.

O numera o loo faia'e e tusa i le ripoti, e pei ona molimau le tausaga na se'i mavae, e tusa ma se 15 pasene o fanau na su'e i le NCEA 1 e lei pasi. Tusa lena ma se 2.8 pasene le faaopopo i le aofa'i o e na le pasi i le 2020.

E le o se faamau tusa'afia lea e pei ona saunoa le peresitene o le asosi a pulea'oga o kolisi, Vaughan Couillault.

E talitonu le peresitene e iloga le sootaga o le le pasi ma le le su'e i su'ega. I se talanoaga ma le Stuff, na ia saunoa ai i nisi o faafitauli o loo feagai ma le fanau a'oga i lana tausiga.

E iai i latou ua filifili e tu'ua le lotoa a'oga ae alu e faigaluega e fesoasoani i le aiga. Ona tu'ua lea o le a'oga ma mea ai se na avanoa e le toe maua. O isi fanau e taumafai e galulue ma toe a'o'oga foi, ae pei ona molimau nisi, e le faigofie ona fai.

E pei ona ta'utino se teine a'oga, e faigaluega i le po atoa ae toe usu i le a'oga i le taeao, e le taitai lava se malologa a le tino e toe fai ai se meaa'oga.

Tusa fo'i pe su'e le su'ega ae e fesiligia le pasi, talu ai e lei lava tapena e pei o isi fanau.

E atagia i le molimau a le pulea'oga le tulaga afaina o fanau i vaega na o le atunuu e maulalo tamaoiga o aiga e nonofo ai.

O se vaega o aiga e faamoemoe i le tausiga a le malo, e le faigaluega matua, e mafua ai le lagona i fanau e fia fesoasoani i le fatuiga.

A o aga'i ina siita'i tau o oloa ma pili e totogi ua faailoa ai popolega o le saga una'ia o fanau e lafoa'i a'oga ae o atu e saili galuega.

Saunoa Couillault, e iai foi ni isi fanau ua tuua a'oga ae saili avanoa i isi a'oa'oga faapitoa e iai tomiai i le palama, faufale, enisinia; o loo ofoina e nisi foi tautua a'oga. Atonu e le afaina tele lena, auā i le iuga, e maua se tusipasi.

Ae alofa i le to'atele e le faailogaina se galuega, pe a manatu i le tele o itula na alu i le potua'oga, e a'o ai tomiai e maua ai se galuega totogi lelei.

Molimau foi le tatou puletini i mataupu a nisi o fanau na o'o i le Tausaga 13, ae toe faama'amulu ona o le tulaga o aiga, ua malo le lagona e fia fesoasoani i le mafatia.

Molimau foi le ripoti i le afaina o fanau Maori nai lo isi fanau. Tusa ma se 27 pasene o i latou na tu'ua le a'oga i le 2022 e leai se tusipasi NCEA. A o se tala fiafia mo fanau Maori o loo to'a'aga e a'o la latou gagana, na o se 13.5 pasene o i latou e lei manuia.

I se vaaiga i le aoao tetele, o loo maualuga pea le numera o fanau e i'u mai ma se tusipasi NCEA, se'i vagana ua talanoa i le 15 pasene o e leai ni tusipasi, ona aliali tele mai lea o Maori ma fanau Pasefika i le pito i luma.

Talia fiafia le ofo a le malo i totogi

Ua talia ma le faafetai le ofo a le malo i o latou totogi, e pei ona faailoa mai e so latou sui.

E pei ona lipotia i le tatou lomiga talu ai, se tasi vaega o le afaigaluega sa faamata'u foi sa latou solotete'e pe a le si'ia o latou totogi, lea e aofia ai le au faufautua i faiga faavae a le malo ma matagaluega, Atoa foi ma foma'i faapitoa o le mafaufau, o nisi e galulue i totonu o a'oga.

E iai foi ma i latou e umia tomiai faapitoa i le a'oa'oina o fanau e iai mana'oga faapitoa i le tautala ma le faaleoga o upu.

Na folafola e i latou se masina atoa e taofia ai le toe tagofia o latou tiute. E lua ni vaiaso na faamamalu se'ia faalava le amoa i le ofo a le malo, lea ua talia nei.

Ua ta'ua i latou o 'field staff' ma o se tasi vaega taua i le atina'e o a'oga ae faapea le atunuu lautele. Ua faailoa le sao o foma'i o le mafaufau i nei aso o le sasao a'e o gasegase faapea i fanau.

Avea le veipa ma fili fou o pulega

E le tasi pe lua ni a'oga ua faailoa ni faafitauli e fesoota'i tonu i le tapa'a eleterone (e-tobacco) poo le veipa i le ta'u lautele.

Muamua o lena i le fa'aaogaina o faleui e i latou ulaula, ua avea ai o ni faamata'u i isi fanau e fia fa'aaogaina.

Tusa i ripoti mai totonu o lotoa, ua iloa le malosi o lena masani i a'oga maualuluga, e foliga e pulea ai faleui e i latou nei e faia lea amio. Ua tu'una ai isi fanau i se tulaga faaletonu ma ono lamatia foi.

Molimau se tasi matua ina ua ia iloa le mea moni sa tupu i lana tama i le a'oga. Na ave i le foma'i ona o se siama i sona totoga sa, ma iloa ai le mea moni, i lona taumafai e 'alofia le faleui. O na mea e lua e fesoota'i, saunoa le tina.

O se molimau lea i nisi o fanau ua aafia, ona ua fefefe e ulufale i faleui ua pulea e le 'aufaapusa veipa. O nisi a'oga ua faapipi'i mea pu'eata e pu'e ai i latou o loo tausolomua.



Te Ope Whakaora

O le vaimasina lena o le sailiga fesoasoani a le Salvation Army ia Niu Sila, e asia ai lou lumafale pe logoina foi lau faauta i luga o auala o fesoota'iga faaneionapo. O le a se foa'i tupe e te mafaia e lagolago ai ana fuafuaga, e talia ma le faafetai. Faafesoota'i le telefoni 0800 53 00 00, pe asiasi i le Upega Tafa'ilagi salvationarmy.org.nz. Faafetai.

Tofa Manino

O le upega e fagota i le po ae talatala i le ao

— fagotaga Samoa anamua

Ne'i Mea Ane ua Galo

Sao o le Auatama i le atina'e talavou



L ATOA AI I LE tausaga lenei lona 83 talu ona faavae le Au a tama (Auatama) i Malua e le faifeau papalagi o Rev Bartlett poo Misi Pati.

O le ulua'i peresitene o le 'au o Alesana. E faapea o le vaega laiti Life Boys (8-12) na muamua faatulaga, sosoo ai lea ma le vaega matutua o tama (13-18), ae mulimuli le Au a teine.

E lei umi se taimi ae faasopolia Samoa i lenei faama'ite. Ma e tusa i molimau a le 'aumatutua, o se tasi lenei o gaioiga sa iloga le apoina e tupulaga mo le ekalesia EFKS lava ia. E mafua lea ona o sini taua e aga'i tonu i le tapenaga o talavou. Faapei o le Boys Scout, e fai le togiga, ma o se faamamaluga muamua e iloa gofie ai se talavou. Lua, e iai ana polokalame faata'oto e taiialaina ai, e le gata i le a'oina o tomami eseese moomia e le tagata soifua, ae faapena fo'i le tapenaga o le mafaufau ma le loto, ae tauluga i le faaleagaga.

E lei aunoa se taimi ae popoto talavou i le selega o maea, ma tomami faapena e faatino ai galuega lavea'i, popoto i le faatinoga o tomami faaola i le vai ma le sami, popoto foi i le musika ma le fa'aaogaga o meafaili eseese.

O na uma tomami na galoma atu ma le toe so'oina ina ua le toe fa'aaauuina. Moni o loo tauavea pea e ala i tomami na faasoa atu, a o sona aafiaga malosi ua le toe iai lea.

O le fesili pe aisea ua le au ai le inailau pei ona sau ai? Ua le maua se tali manino, ae e le pine e iai lava ni mafua'aga. Na o se mafaufauga e fua i le agaga o le na fofoina le Boys Brigade, Sir William Alexander Smith o Sikotilani, i le 1883, na mana'o ia popoto talavou a

O LE ASO I LOU TALA FAASOLOPITO

SAMOA HISTORY

"Ne'i mea ane ua galo"

Copyright Reserved LPSTavita

~ AUKUSO 1-14 ~

1

1914 Amata faavae lotoa a'oga Malifa i le ata a Niu Sila
1942 Taunuu vaega'au 22 Marini Meleke
1962 Saini feagaiga faauo Samoa & Niu Sila
1980 Faavae pulega lotu EFKAS
2002 Tuumalo AP Lutali

2

1888 Faavae a'oga Siamani i Apia
2020 Maliu Aumua Mataitusi, faia'oga

3

1965 Faamau afaina faatoaga fa'i, laufetiitii
1985 Aso soifua Sonny Bill Williams
1994 Malo Manu Samoa ia NSW, 21-18

4

1880 Sunui aai o Palauli e Faasaleleaga ma Satupa'itea
1905 Pa le maugamu o Matavanu tafia ai aai tuai o Lealatele ma Saleaula
1940 Faavae le Auatama i Malua, ulua'i peresitene Alesana FFA
1999 Tutula'i Leafa Vitale & Toi Aukuso luma o le faamasinoga

5

1914 Autasi fono a Sulusi ma lana pulega e le tetee atu i le ulufale mai o fitafita a Niu Sila

6

1921 Aso soifua Mataafa Fiaame Mulinuu II
1983 Faapa'ia malumalu Mamona i Pesega

1839 Ulua'i malaga misionare Samoa e 12 e galulue i le Pasefika

1981 Faatama'ia le Tivoli e le afi
2004 Taunuu mamoe Fiti i Samoa

2012 Faamagalo Alatise Vitale 50 o Samoa

7

1997 Atenai. Pine Auro Beatrice Faumuina
Togi Pulu salafalafa tamaitai lalolagi

8

2014 Tuumalo Aiono Dr Fanafi Le Tagaloo

10

1987 Faatino galuega Faamasinoga Maua-luga i Salafai taimi muamua

11

1889 A'e i fanua tafeaga a Malietoa
1894 Tu'i Luatuanuu e vaatau a Peretania
1925 Taunuu i Amerika Samoa Margaret Mead, 24, i ana su'esu'ega

12

1845 Taunuu i Falealupo Roudaire & Violette o le Lotu Katoliko

1948 Aso soifua fatusolo Savea Sano Malifa

14

1905 Poloa'iina le tuua o Mulinuu e faipule malo Taimua ma Faipule

lona nuu, Sikotilani, i tomami faafitafita, le faamalositino, e iai ma le fiafia e fai ai. O nei polokalame e tapenaina ai fanau i le usita'i ma le faalogo e pei ona faia i nofoaga moni faafitafita.

O le tasi vaega taua o lana miti, ia faasafua le avanoa i talavou uma; e le noatia le miti i se lotu poo se pulega e tasi, a ia avea o se faalapotopotoga mo fanau uma. Atonu o le agaga lea na malo i le iuga, ina ua fai ifo le Auatama ae amata ona faamaopoopo faaili pu a nuu, e fa'aaoga ai tomami sa maua mai ai. O faaili a nuu e le faailogaina se sui auai i se ekalesia ae tatala i talavou uma.

Atonu la o le Auatama o se faama'ite ua fai si vave mo lona taimi pe a. Auā ua iloa nei le taua o ona sini i nei aso o le lualuta o

suiga, e moomia tele ai le mafatotoga i aga tauleamio pulea faapei o se fitafita; ae faapena tomami faaola e faasao ai lou tagata ma isi i ni faalavelave faigata.

Aulia mai le aso, e 60 atunuu o loo latou fa'aaauua le mau a le Auatama, e lata i se 800,000 ona sui auai i le lalolagi, e tusa i sana molimau. O lea e faamaonia ai o loo ola pea le sulu ma le alaga 'Sure and Steadfast, Faamaoni ma Lotomau' i le lalolagi. E ta'u mai ai foi, o loo mana'omia pea lenei ata faamaopoopo e le lalolagi mo ana talavou.

Ata i lalo: O le Auatama (Boys Brigade) afoaga o Vaimoso, o loo tauavea pea le sulu mo Samoa. E iloga foi lona toe tapenaga i le faamalosi o le auai o talavou uma a le nuu, e le faapito i se fatafaitaulaga poo se aiga.



Faasoa o le Vaiaso:

Taimi e amana'ia ai tamaoaiga afua a'e i le fanua

O se tasi o taulagalaga faalekelope ua vavala mai sona taua, o lena o le tamaoaiga e afua a'e i le fanua. O le tamaoaiga lea e faasino tonu i auala sa fa'aaoga e tua'a anamua e gaosi ai o latou tamaoaiga, a o lei suia e le tamaoaiga mai fafo na aumai e papalagi.

E le o po se lilo, e ulufale mai papalagi i le Pasefika ua autupulagā tamaoaiga o atumotu, ae na vave ona lafoa'iina ina ua malosi le faumalo o taofi mai fafo. O ia taofi o loo taumau pea i ai le to'atele, e o'o lava i nofoaga pei o iunivesite e tataua ona sili a'e sa latou silasila. O le fa'alavelave foi auā o le tele o iunivesite ma a'oga Pasefika faaonaponei o loo gaoioi i faiga faavae mai fafo atoa foi ma talitonuga.

Peita'i ua iai ni a'oga ua latou lagonaina le vala'au ma faapea ona sagai atu e tilotilo ma matau, ma o nisi foi ua sauni e auai ma le mautinoa i lena savaliga i luma.

E pei la o iunivesite a tagata Maori, e iai lena o loo galulue vaavaalua ma le iunivesite a Kenetaperi i Kalaiesetete. O le vaiaso na se'i mavae na saina ai se pepa o 'autasiga ma ni iunivesite se lua i Kanata. O na iunivesite o loo taulamua i le una'ia o le mau o le faafo'isia o le lalolagi i tamaoaiga sa masani mai ai.

A fesili pe aisea. O le tali e maua i le mano o molimau e faamaonia ai le sili a'e o auala tuai i lo auala a papalagi sa faaofi mai. E mafua lea i le tulaga tuufaafegai o faiga e lua. Faiga a tua'a anamua sa limata'ita'iina e le tofa mamao o se faiga faaualoa. E mafua ai ona tuuavana o le eleele ma la'au, e iai ona fua ni tapu e vaioa ai le tagofia o i'a ma fua o laau, ae se'i toe faaolaola puna'oa o le tamaoaiga.

Faiga faapapalagi e limata'ita'iina e le polifiti ma le tupe e faasao. E iloa le tamaoaiga i le paleni o i le faletupe ma le vaevaega o lena i

sina pasene faatauvaa o le aufai sea. Faiga tuai e faisea tagata uma o le nuu, le atunuu. E le i tupe a o le tofi e soifua fiafia ai ma tuu atu i fanau.

Ona o le faaloloto o sina pasene faatauvaa, e mafua ai ona ta le vao, eli le eleele, suotosina le sami i upega tetele, faatau atu fanua ma meatotino, se'ia le toe iai se puna e tali mai. O le iuga, e le tau faamatalaina.

O lea ua molimau le faavevelaina o le kelope, lea e manatu le Failautusi o Malo Afaatasi, ua le toe vevela a ua pupuna. Ma e leai se mataupu e sili ona 'autasi ai le aai o finagalo i saienitisi a le lalolagi, nai lo lena. O la latou lapata'iga, a le suia vave le alavaa, e le tauilo le iuga o loo faatali mai i luma. Sefulu tausaga? Tolusefulu? Limasefulu? E fuafua lava i le tali atu a le lalolagi i lena lu'i aupito taua i lona talafaasolo.

I lena taimi o le taugata o le soifuaga, ae faitau afe tone o oloa mea'ai e lafoa'i e pisinisi i lapisi i aso uma. E 1.3 piliona tone, poo le tasivaetolu o taumafa a le lalolagi e tia'i maumau i tausaga ta'itasi. O se ata faanoanoa lena e molimau i le faiga o loo gaosi ai tamaoaiga faaonaponei, e faamuamua ai tupe i tagata.

I le matau atu i le atina'e o tagata Maori, ua iloa ai se fulisa'iga i le vaai ma le faatinoga. Ina ua inivesi nisi o ana pisinisi tetele i atina'e na e puipui ai le si'osi'omaga fanua ma tagata. O ni faiga lava sa tauavaina e o latou tua'a, ma iloa le aogā, a o lei taunuu papalagi mai Europa. O na ua fusia faatasi ma le tofa manino e a'oa'oina i potua'oga, e ave ai le faamamafa i le tagata atoa ma ana faiā i le foafoaga.

E le o toe fesiligia le moni: ua siliga ni tali mai atagalua faa-Europa poo na e faavae i le tupe. Auā o le tamaoaiga i le vaai a tagata o le eleele e faavae i le mau e taua le tofi, e taua le faaualoa auā tupulaga lalovaoa. Tamaoaiga e le vavae esea mai le ola fiafia o tagata ma meafaiola uma.

Aso o talavou ma agaifanua na mua i malae

O LE ASO 12 o Aukuso ua togia e le Malo Afaatasi e faatau ai le 'autalavou. Faapea mai lana upega tafa'ilagi, o le talavou e i le va o le 15 i le 24. Pe a ma le tasi-vae-ono o le faitau aofa'i o le lalolagi o talavou, to'atele e nonofo i malo tauatia'e.

Ta'ua foi le sini maualuga o le aso, e matau toto'a ma patipatia sao tausafia o talavou i nuu ma malo, ma lagolagoina foi lo latou auai i soo se taupulega, galuega ma taaloga, mo ni faata'ita'iga.

E moni le muagagana, o le tama valevale i le asō e ave ma tamāloa ataeao. Sa tatou ui mai ai foi i lena laasaga o le olaga, tele o taimi i a'oga, ae to'atele foi isi i fale ma nofoaga faigaluega.

Tepa i tua i le 50 tausaga, sa lei iloga ona tele ni avanoa mo talavou i taupulega, a'oga, galuega ma taaloga. Lenei ua tatou molimau i le lasi o faitoto'a matala sa lei avanoa muamua i ai. Mo se faata'ita'iga, i le atina'e

o taaloga, ua fa'aaoga lelei e fanau a latou taleni ta'alo e sailimalo ai. Ua mafai e ni totogi lelei ona faamautu ni lumana'i mo latou ma aiga foi.

O taaloga sa na o alii ua oo foi i ai le malosi o le inailau a tama'ita'i, e molimau suiga mata'ina i tauvaga faavaomalo, ua tauva tutusa malo tauatia'e ma na sa faumalo, pe ua sili a'e foi.

Peita'i ua iloa foi le ma'ale'ale o lena vaitausaga, aemaise i nei aso o le saosaoa o suiga. Fai mai foma'i e lei iloga ona atoa le mafaufau e fai ai ni faaiuga tonu ma lelei. Talanoa i vailaau ua tumu ai vaifanua, talanoa i faatosina o aga saua ma tu faale talutalufou, e le o ni tamai lu'i nei mo latou. O taimi foi ia e feagai ai ma lagona o le le mautonu, le sailiga poo ai lona tagata. To'atele e tauivi ma ma'i o le mafaufau.

La lea e malosi le taofi e maua le fesoasoani ia tatou lava aganuu ta'uleleia. E maua ia tatou fofu ma auala masani. E maua i le faaolaola pea o la tatou gagana ma measina. Ua iloa le sootaga o ausiga mata'ina ma le mautulaga i na faavae.

Tulimanu o Pola:

E muamua la'u faafetai i le Tamā i le lagi i lou soifua ma so'u malosi ua tatou toe fesilafa'i ai i lena foi taeao manino. Malo le soifua maua.



E le tauilo o se tala faafiafialoto mo susuga i faia'oga ina ua fetai fola o le mana'o ma le talimana'o, ta'ua a Tupua i sana pepa. Ua faitau aso le taufaloga, avatu aumai se'ia maua le tali, ua lata mai le palota. E leai se faigamalo e alotamala, o a togafiti i le api e ava'e uma i luga. Ae to lo'u pulou i le alii teutupe, masalo o ia e ana le togafiti e totogi le isi 'afa i le tala o le tupe e lei fanau mai.

Mo'i, toe o ni nai vaiaso ona filifili lea o Niu Sila. O a'u lava ia e tilotilo poo ai le manu e tamo'e mo a'oga. Ua tele manu o le tuuga, o manu masani a ua sui a latou jockey. Tasi le manu e lei suia le jockey, o lena ua silafia. Ua iloa foi le mea e mafua ai le saosaoa o le manu lea, ona e leiloa faatafa ia i latou ua ova aso, ia, ma aia tataua a nai uso Maoli.

I la'u faitau atu i le talafaasolo ma le lipoti i le Auatama, e pei lava ua ta toe ofuina na teuga ma lota ulu fefete. Ia, na o le sa'afi maimau e pe 'ana umi le ata. Faamalo ia Vaimoso i le elielia pea o le magavai, atonu lava e sau se aso toe tafe tetele. Pe le o le tali lea i le to'atele e le iu a'oga, alu sa'o loa i le 'AU, a'oa'o ai nisi tomā aoga—ma le amio? A fo'i !

Ou te lagolagoina le taofi o le faasoa i le taua o tamaoaiga tupu a'e i eleele moni. Ou te talitonu o tamaoaiga nei e sili le talimana'o i nai aiga matitiva. O tamaoaiga mai ata i fafo e lelei mo le malo ma sina vaega to'aititi, ae le manuia tele ai le 'aulima vaivai ma na e mamao ese ma taulaga. Ta te vaai atu ma le faanoanoa i nisi o malo Amerika i saute, Aferika, e 'oa i minerale, ae tau tulei taavale i auala palapala pe a timuga. O molimau na i le lafoa'iina e malo o auala tuai, ina ua apo auala mai fafo.

Ou te manatua le upu a le alii polofesa ua malolo, Maualaivao Albert Wendt. Sa ou fesiligia i se faatalatalanoaga, i sona taofi i le faaalatua i taimi o palota. O lana tali, se'i iloga lava e tutusa uma aiga i le faasoa a le tamaoaiga, ona muta lea. E faamaonia lea i faiga palota a Niu Sila nei, e le popole le faipule i se na tulaga. Auā e maua le falaoa ma le susu e aiga uma auā tamaiti. E mafua le tali alalo a nisi ona o le tausiga o fanau.

Mulimuli ane, e manatua le faamoemoe o le FAGASA ma nai fanau i lena vaiaso. E le o fanau uma e maua le tomā o le laulaufaiva molemole, o lea e taua ai nei tauvaga. O tomā e taofi ai faamatalaga ma fa'aali atu i luma o tagata ua tauau e sola, ina ua malosi le faitau mai i tioata o telefoni. O lea ua tataua ai le faamalo i nei fanau. E o'o foi i le solo, ua tauau e mou atu foi—Igilisi pe Samoa, a o le naunauga, ia faaolaola pea le magalafu. Ua toe taumafai atu e faalamolemole a ua tuai. Moni le upu, e maua nisi mea ae le maua isi mea. Ae faafetaia. Manuia le alofaiva.

UILI FAU UPU

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Ta’u mai ni uiga se lua o le upu *vili* i le 1. Samoa 2. Igilisi:

2. Sa’ili ni upu se 5 e faai’u i le fasiupu *vi*

3. Su’e se upu e 9 mata’itusi ma tusi sona fa’amatalaga:



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

Lelei atoa = 12 upu


Lelei tele = 8 upu

Lelei = 6 upu

PASO I GAGANA E LUA/12

Faatumu i upu/igoa Peretania e soa tutusa (vaai ft.)

Fill crossword with English words/names



©LPSL TAVITA

Faalava ~ Across


- 1 maketi (6)
- 4 Arapi (4)
- 8 pito, itu (4)
- 9 vaega poo kulupu (6)
- 11 Se mea e faamaonia ai oe (2)
- 12 faamasani tagata (8)
- 16 uluai faailoga iunivesite (2)
- 17 faapuupuu-faata’ita’iga (2)
- 19 Masina o Tesema (8)
- 20 o se pese aualofa (3)
- 25 upu e faailoa ai le te’i ua fiafia (3)
- 27 o tagata moni o Hawaii (9)
- 28 tama a le ’oti tina (3)
- Lalo ~ Down
- 1 telē tele, lapo’a (7)

2 ti’eti’e (4)

- 3 igoa o se ata a tamaiti (1,1)
- 5 lapotopoto (5)
- 6 fia pule, amio pei se pule (5)
- 7 laau (4)
- 10 poo (le) (2)
- 12 mou atu, matafi (4)
- 13 inisi (4)
- 14 Ata tifaga: igoa o se i’a ata tifaga a tamaiti (4)
- 15 o se anufe miti’ia le toto mai tino o manu poo tagata (5)
- 18 alu, o (2)
- 21 lalo (4)
- 22 Kalama: atikale mautinoa (3)
- 23 apa tuu ai lapisi (3)
- 24 atigi’apa (3)
- 25 Fesili (3)
- 26 sooupu: Simi _ Sieni (2)


SU’ESU’EGA: FA’ASOA LE ATA O LE I’A MA LONA IGOA

1. PALAGI
2. FUGA
3. TIFITIFI
4. MANINI
5. LO
6. GATALA



Galuega fa’aopoopo:

1. E iai ni aoga o nei i’a i tagata/ ma le si’osi’omaga?
2. E iai ni upu/solo/pese a Samoa e fai i ai?
3. O a ni faailoga e tulagaese ai?
4. E te iloa ni isi o latou igoa i isi gagana poo le tatou fo’i?



SUDOKU: Faatonuga:


Fa’atumu pusa numeru (tama’i sikuea) i fuainumera 1 i le 9. Ia uma ane le galuega ua maua atulaina ta’itasi (tu, fa’alava) o iai le 1 i le 9. E tofua le atulaina ma lona fa’atulagaga e ese mai le isi.

SUDOKU ~ TAALOGA I NUMERA (sudoku.com)

8		5			9	7	4
		3		8	6		9
	9		4		2		6
	2		5		3		
	5		6			9	4
		4			8	6	2
						2	3
4	3			6	1		5
9	1		8		5	4	7

~ TAALOGA PASO SAMOA I LE GAGANA SAMOA ~ POTO LAUTELE ~

1. Faatumu le pusa i upu/igoa Samoa poo se tasi e faatonuina.
2. E maua le faailoga \$100 mo sē e muamua faatumuina le paso i lona sa'o atoatoa (Totonu o le vaiaso 1).
3. E leai se tasi na maua le faatulagaga sa'o o le paso lomiga 10.



Copyright LPSL Tavita 2023

FAALAVA ~ ACROSS

1. Se'i va'ai fo'i (6)
4. Upu lauga: Ua lupepe le ? (10)
10. Laumua EFKS i Samoa (5)
14. se mea ua tupu (11)
15. Tala o se nuu e faia pea (11)
16. tele ma'a o se fanua (3)
17. Tupuga mai ai Iesu Mesia (4,1,6)
18. Tutusa uma itu o le fua (6)
19. pa'i i ai (4)
20. Tuuga solofanua: Mua i le a? (3)
23. gasolo atu i se nofoaga (7)
28. Vaolia Samoa: Ua _ le fili (3)
30. talanoa faatatau i se mataupu (6)
32. Tala a Apelu Aiavao i le tama _ (7)
33. o se pua'a fagafao puta (2)
34. pito i luma fale Samoa (8)
38. se nuu o le Faasaleleaga (3)
39. faamatagofie (3)
40. Aufaipese e ana le pese Ramona (6)

43. sasau le pate (2)
44. Upufai Samoa: faipule mai Faleata ua ulufale i le vaega a le FAST (3)
46. se afioaga i Safata (9)
47. Fesili: Ni a _ oe? (2)
48. Pese: Ua lologo le fua ma le a? (3)
49. Faalogo ma talia se poloaiga poo se talosaga (5)
52. Taofiofi le toto ua masaa mai le tino i se ieie poo se mea faapena e puni ai (3)
54. Se isi suafa o Maria Tina o Iesu (9)
59. feagai ma tiga o le tino ma le mafaufau i se fe'au tele sa fai (8)
60. o se manu o le gataifale (4)
61. Tusi Paia: nuu moni o Aperamo (3)
63. Autafiti ona o se ma'i (3)
64. Pese: O aso o le _ na (6)
65. Se mata'aga vaitaele i Lotofaga (5)
70. filifili se aso poo se vaitau (5)
71. Se isi upu tutusa ma le 'tauilu' (6)

72. Sauniga o se maliu, osi le lagi (10)
 77. Alu a'e i luga le afi (5)
 79. o se i'a taatele (2)
 80. Kalama Fauupu: ta'u ai ituaiga fausaga o nauna ma soanauna poo faailonauna; poo veape foi ma soaveape poo se tasi soapu (6)
 81. Gagana: E _ lava le matou faipule muamua (2,4)
 82. Feagaiga ma le faifeau: upu e tutusa ma le tuuoti (6)
 83. Fesili i se tasi, faamoemoe i se isi (4)
 86. momoli se malaga i le malaevaalele (3,2)
 87. E faalupe ai malae o Ti'afau: _ a Samoa (5,1,12)
 89. Faamalo: _ faalalelei (3)
 90. A'oga Tusi Paia: I le tusi o Mataio 10. 42, o le a e te avatu i se isi, faamatala i le upu 'malulu'? (3,3)
 91. Malo temokarasi: Faalupega ta'ita'ifono o le palemene (6,7)
- LALO ~ DOWN

1. Pule o le tausama'aga, se isi ta'u (6)
2. Malilie faatasi i se tonu (7)
3. Aganuu: o se si'i faaloalo i se faaulufalega (7)
5. o se suli tane o se tamaloa (6)
6. Moe a le tagata ma'i (6)
7. Tusi Paia: tupu lona lua Isaraelu, tusi o le 1 Tupu 14 (6)
8. EFKS faifeau sa ta'ita'ifono, mai Lotofaga, maliu atu nei (7)
9. Malaga e savavali ma aai (6)
10. Faamatala ai se loto e le suia (4)
11. E tiute i le po (6,2)
12. Aso tonu na maliu ai le Alii Faola (3,7)
13. suafa o le komesina mauuluga Samoa i Ausetalia: Hinauri ? (6)
21. Se afioaga i Salafai (5)
22. Faalupe o le ma'upu i Leauvaa (9)
24. Ffilemu leai se pisa (3)
25. Mea'ai gaosi: lomi i lima (3)

PASO SAMOA MAUA LE TAU

- 26. Leai ni í'a o le faiva (3)
- 27. talatuu: igoa o le uluai ietoga lalaga e Sina: Fala o ? (4)
- 28. Pa'ú ifo le popo lavea ai (4)
- 29. afua (se isi upu uiga tutusa) (5)
- 31. Tusi Paia: Aai na asia e Paulo tele ai tupua—Galuega 17.16ff
- 35. Tutu i luga lauulu o se tasi (5)
- 36. Pese: O ai na tagisia i se vaa ia goto? (5)
- 37. E tele atu tausaga i lo le isi (5)
- 40. o se afioaga i Salafai (4)
- 41. auala anamua gasese ai mea'ai (3)
- 42. valaau e sau i totonu o le maea (3)
- 45. faalapopototo (3)
- 47. Fitafita: Aga faaali ai le faaaloalo (5)
- 50. se isi ta'u o ala'alo; faatatau foi i ni faiga e faatogafiti (6)
- 51. igoa o se tasi ituaiga 'ulu (4)
- 52. fa'aali atu (se isi upu) (3)
- 53. e au ina tupu ae le mautinoa (3)
- 55. Ata tifaga teine o Moana (5)
- 56. e tatala ai (2)
- 57. se suafa matai Malie ma isi nu'u (5)
- 58. Tala faaSamoa: Tuagane o Tapuitema na 'ote i lona tuafafine (5)
- 60. nota o le pese (4)


- 62. se aufaipese iloga mai Nofaalii (4,6)
- 65. tuai le taimi o le pese (4)
- 66. Poto faa-Samoa: O le Tofa _ (5)
- 67. ua filifilia se aso e faataunuu ai (5)
- 68. Upu o lauga: Ua _ le vaa o mala (7)
- 69. alu a'e i luga o le niu (2)
- 72. fale e togafiti ai ma'i (7)
- 73. upu e faamatala ai se tagata e fa'aaoga ona aiga e su'e mea ai (7)
- 74. Ta'u ai pese ma faafiatiaga tuai e fiafia pea i ai (7)
- 75. o le pa'a e 'aia fua o niu (2)
- 76. Lakapi Amerika: Isaac ? (7)



- 78. Faameo (se isi upu tutusa uiga) (6)
- 79. Filogia (se isi upu tutusa uiga) (6)
- 83. mea ua le uma ona fa'aaoga (5)
- 84. maua se malaga e le po (5)
- 85. gata ai: pei o le tala ia Poluleuligaga na _ ai le aso o Malietoa (3)
- 88. Tali tete'e (2)

TALI PASO LOMIGA 11

M	A	M	A	F	A	A	T	O	A	O	S	A	M	O	A	A	U	M	U	A	
A	A	A	A	A	U	S	A	A	F	S	A	F	S	A	F	S	A	F	S	A	
S	A	V	E	A	S	I	U	L	E	O	F	A	A	S	I	N	O	M	A	G	A
O	A	F	S	I	N	I	U	S	A	A	S	M	A	S	M	A	S	M	A	S	M
F	U	E	L	A	V	E	L	A	V	E	N	E	I	A	F	U	S	O	U	A	S
A	G	L	A	U	I	T	E	N	I	F	A	S	A	F	A	S	A	F	A	S	A
G	A	S	E	A	U	P	E	E	L	A	A	F	A	O	M	E	A	A	F	A	S
K	I	T	A	U	T	U	M	A	V	I	L	A	G	A	V	I	L	A	G	A	V
A	I	L	A	U	U	L	U	U	A	A	L	A	T	E	O	O	A	A	L	A	T
L	E	L	I	M	U	E	L	O	T	O	T	T	U	A	L	A	T	E	O	O	A
A	I	T	A	U	M	A	L	E	L	E	A	V	A	P	A	V	A	F	A	S	A
M	A	I	O	M	S	T	O	A	T	U	T	O	O	A	T	U	T	O	O	A	T
A	T	I	N	A	E	L	E	L	E	P	A	A	T	O	A	T	O	A	T	O	A
U	A	K	A	I	A	A	A	A	I	O	U	U	S	U	A	K	A	I	A	A	A
P	A	L	U	T	U	L	O	I	L	O	I	T	A	U	A	T	A	A	T	A	A
O	M	M	O	I	N	L	O	A	T	F	U	A	T	A	A	T	A	A	T	A	A
A	L	E	A	L	E	U	L	A	L	E	I	U	T	A	I	S	U	A	L	E	A
O	T	N	U	A	E	L	U	E	F	U	I	U	P	U	A	L	E	A	L	E	A
M	A	F	I	N	E	N	U	U	U	L	I	F	A	L	O	U	A	A	L	E	A
A	U	U	S	P	A	T	O	E	U	P	U	I	A	A	L	E	A	L	E	A	A
F	A	A	V	A	E	I	L	E	A	T	U	A	S	A	M	O	A	U	T	A	A
U	T	G	O	L	E	T	G	T	E	S	E	I	A	L	E	A	L	E	A	A	A
A	M	I	T	A	I	F	E	M	A	L	A	M	A	L	A	M	A	I	A	A	A



Solo mai le tusi solo—Song & Return (fl.)

TIMU



Savea Sano Malifa

Na sau le matagi ma le timu
 Ona ou manatua lea mea uma ua tutupu,
 mea uma e taua,
 Auā i lena taimi pe a sau le timu,
 e matala ai se faitoto'a tele,
 ma ou iloa atu ai ma'ataua feilafi
 i o latou lanu matagofie,
 i o latou tino eseese
 fa'aapei o se aiga faasau ua fusia i lalo ifo;

Ma i lena taimi, ou te iloa atu ai le tupuga
 o mea uma ua tutupu, lo latou taua naua,
 auā e iai le moni i le timu,
 le loloto, le pegase o le manatu ua ma'alili,
 pe a mātala manatuaga e pei se manu'a
 ua mafu, a ua le lagonaina.
 E ui ina malosi ma ma'a'a le matagi, na te le
 tafia se mea ae na o laula'au mamago,
 fa'anoanoaga, mea mamate uma.

Peita'i le timu,
 o le na te tatauina le eleele ma fa'aofu e
 pei o se oti,
 ma te savavali fa'atasi i le aiga—
 I ona lima, momose ma ti'a'a o iai le
 fa'amalosiga, mafanafana tumau
 mo se to'atasi, e faigata ona fetu'uina.

Tusi faitau faatau atu e le Evaleon-Niupac

Fesoota'iga mo sau faatau:
 Tuātusi: ola.niupac@gmail.com
 Telefoni: 02102567412

MAU FAASAMOA ANAMUA: FAAMAUINA E MISI SIAOSI TANA A O GALUE AI I SAMOA



Mau faa-Samoa: o le lagi ma mea o loo iai



TELE TALA TAU
UPUTUU a Samoa
i le masina pei foi o
isi vaega o le lalolagi.
E i ai le tala o le
asiasiga a ni tagata se
to'alua na alu i le

masina, o le igoa o le tasi o Punifaga a
o le isi o Tafaliu.

Na a'e le isi i se laau ma o'o ai i le
masina a o le tasi sa alu i le asuasu
faaniutu. Ua tatou faalogo foi i le tala
ia Sina ma lana tama, fai mai ua leva
ona i ai i le masina. Fai mai le tala sa le
iloga le mea e ta i ai ona lima i le
sasaga o ana u'a e fai ai lona ofu. O
aso tonu ia o lo o vevela le oge i le
nuu.

Na oso a'e le masina, ona vaai atu
lea o Sina ma na manatua ai foliga o se
'ulu; o lea na ia pupula atu ai i le
masina ma faapea, "Se, o le a e nofo mai
iina a e le se'i aumai oe e 'ai a'e e si a'u tama
a mole i le fia'ai." A o le masina na 'a'asa tu
lona ita i le faalemigao a Sina ia te ia ma lona
mana'o.

Na sau le masina i lalo ia Sina e le ina ia 'aina o
ia a ua ave ia Sina ma si ana tama. Na aveola ai
foi ma le sa'afa atoa ma le upeti i le masina. O
lea a oo ina atoa le masina ma ua tepa i ai
ia Samoa valevale, ona latou faasolo ai lea ona
matau ia foliga o Sina ma si ana tama faapea ia
le upeti, e tusa o le tala.

E fai ia le masina ma le e vaaia ia le gasolo o
tausaga. E vaevaea ia le tausaga i masina
malama e sefululua, ma e iloa i masina ta'itasi
i o latou igoa, i le atunuu atoa. A e ua i ai foi ia
ni eseese ititi e iloa i nisi tu, e i ai ia se atua e
tapua'ia i le va i tausaga. E faapea le tala i aso
anamua sa masani ona faaigoa ia masina i igoa o
atua sa tapua'ia i ia lava aso. A e o atunuu
faapenei e le i ai ni a latou mataugafetu mautu,
o lea e matele ai ina fefaataua'i a latou
matauga ma e oo mai i nei aso e tutusa lava.

IANUARI:

E faapea le taofi o nisi o le pogai o Utuvamua
o le uso tama o Utuvamua ma Utuvamuli na
sosola mai i le lalolagi mai le taua tele sa faia i le
lagi. O lea na latou o mai ma aumai ai le tau
matagi ma le timu.

O le faamatalaga lona tolu e faapea o le uso e
to'alua o Utuvamua ma Utuvamuli, na sosola i le
lagi mai le lalolagi i le taua. Na tele tagata na
fasia ma liu mauga ai i vanu. Na iloa atu e tama
ia le mea ua tupu ona fetagisi ai lea ma le
tagitu'i; o le faanoanoa tele o tama na ala ai ia le
matagi ma le timuga o aso e pa'utonu ia Ianuari.
E ta'ua foi le masina lea ia Atuatele, aua o le
masina lea e tapua'ia ai tagata i le atua lea. E taua
foi le masina lea i nisi nuu o Tagaloatele, ona o le
ala lava e tasi.



Ta'otoga fui fetu e fitu faaigoa e Samoa o le Lii poo le Mataalii, i tagata Maori o le Matariki, e fetala'i ai mau a ituaiga e lua

FEPUARI:

E taua lea masina o Toeutuva, auā e toe eli ai
ia to ufi i ia aso. E taua foi faapea o le masina
lea e toe tasua ai i luga ia matagi ina ia afa. O le
isi foi igoa o le masina leni o Atuaite, aua e
tapua'ia ai ia atua laiti i le va i tausaga lea.

MATI:

ua taua o Fa'aafu ona o le va i taimi lea e afu ai
ufi faapea foi ma isi laau. O le tasi foi igoa o le
masina leni o Taafuna, ona o le atua e ta'a
faasauatoa i le nuu uma i aso ia. E taua fo'i le
masina lea o Atuaite aua e tapua'ia ai tagata i
atua fale ina ia faamanuia mai i le aiga, ina ia
faamamao ia fevaevae'iga o aiga faapea
taua.

APERILA:

E ta'ua o Lo aua e a'e ai le i'a lea. E taua foi o
Fanoga ia le masina leni a e maise lava i le
atusasa'e.

ME:

E ta'ua o Aununu auā e manunu ai 'au o ufi. E
taofi nisi e ta'u faapea ona o saualii e tata'a ai i
le nuu i aso ia. E oo foi i i'a o le tai e talitonu
tagata e ulu ai saualii nei ma e matua fe'ai tele
ia i'a i le va i tausaga lea. E iloga leni masina i
lona le lelei mo le soifuaga aua e sui ai le tau
mai le susu i le mago, o lea foi e faatetele ai ia
le talitonu i mea faasaualii. E ta'ua foi le masina
lea o Sina ona e tapua'ia ai Sina.

IUNI:

E igoa ia Oloamanu, na faaigoa faapea ona o le
malie o pesega a manu e fai i vaitausaga ia i
luga o mea'ai e tele. E tele fualaau i fuga o laau
e i ai le gatae ma isi lava laau e i le aiga lea. E
tosina e fualaau mumu o ia laau ia segavao,
segamau'u ma isi lava manu lele pese malie.

IULAI:

E ta'ua o Palolomua. O le masina muamua leni
o le tauga o vaipalolo, e pei o isi vaega e taua o
vaito'elau. O le palolo o se anufe le laumaua

lea e mapuna mai le iliti tai i lalo o aau mo ni aso
se tolu i le tausaga atoa. E fai ma vaisu o tagata
o le atunuu ia leni figota, ona o lona tofolele
atoa ma le seasea ona maua.

A tuai ona oso ia le kuata mulimuli o le masina
malama ia Oketopa, ona ta ai lea o palolo i le
aso e vaaia ai le kuata lea faapea ma isi aso e lua
e sosoo ai. Afai a e vaaia vave ia le kuata
mulimuli o le masina malama ia Oketopa ona
faato'a ta ai lea o palolo i le kuata mulimuli o le
masina malama ia Novema. O le aso muamua
lava po o le aso lona lua e pito tele ai palolo.

AOKUSO:

E ta'ua o Palolomuli. E na o le afa itula e tumau
ai le palolo i le sami ina ua a'e mai le ilititai, a o
le'i oso le la. E mou atu ma le toe iloa pe a oso
le la.

SETEMA: E taua le masina lea o Mulifā, o lona
uiga o le muli o tiapula. E vevela le la i ia aso ma
e toe ai na o sina mea ititi o le tiapula i luga
o le eleele. O le i'uga foi leni o le tau e a'e ai le
i'a e igoa o le Fa. O le tasi foi lea faamatalaga e
fai i le masina leni.

OKETOPA:

E taua o Lotuaga. E mafua ona o le vaitausaga
lea e tapua'ia ai tagata ia timu tele.

NOVEMA:

E taua le masina leni o Taumafamua auā e tele
le mau i aso ia. E faia tausamiga o palolo ma
tausamiga o maunu. E faia ia i maota o alii taua
o le nuu.

TESEMA:

E faaigoa le masina lea ia Toetaumafa, auā e
amata iinei le ape o mea tausami. E faaleai ni
mea'ai se'ia o'o ina le toe maua se mea e tasi
talua ai ia matagi ma asiosio e i le masina lea.

**Fesili faigata: Pe le ua sili ona atagia le tausaga
ma ona vaimasina faasolo ia tatou lava igoa, i
lo na e nonō mai fafo?**

O SE FAGOGO MO VASEGA MATUTUA

O le povi faafefe tamaiti



GOTO loa le la ona vala'au lea o tina i lana fanau, 'O mai i le fale,' lona uiga ua o'o i le itula e taasualii ai le nu'u. Mo le fanau iti, e lapata'ia i le vala'au, "oti a i le povi,' ona vave lea le o mai i totonu.

O le nuu o Falelima i Savaii ua iloa uma e le to'atele, talu ai o le nofoaga lea o le aitu ta'uta'ua, o lona igoa o Nifoloa. Na ou ola a'e ma faalogo i tala uiga ese i lenei aitu, ma e ui ina ou nofo i Upolu ae pei lava o le nuu tua'oi lea e iai Falelima, ona o lo'u pala'ai i lenei aitu. O lo'u tina e musu tele e talanoa i le Nifoloa, ae ou te tauanauina lava.

A faamatala la sana tala e musumusu muamua, pei o loo fai sana tatalo. A faamatala fo'i e tau le lagona lona leo. E peisea'i e musu e faamatala, ma ua atili ai lo'u fefevale. Ae a ou faalogogatā pe 'augata e fai ana fe'au ona vave lea ona faapea mai, 'E ita tele le Nifoloa i tamaiti e paiē ma ulavavale.'

Ua ou nofo nei ma toe mafauafau ina ua ou matua, i le tele o fe'au aoga a lo matou aiga na ou faia i na aso ona o lo'u pala'ai tele i le Nifoloa. O le mea fo'i lena na ou to'aga ai i le A'oga Aso Sa aua fai mai le faletua o le faifeau, o lesu o le uo a tamaiti na te puipui i latou mai aitu e iai le Nifoloa. Fai mai a ia, 'Na o lesu lava e fefe ai le Nifoloa, to'aga mai la'ia i le a'oga.'

E le galo ia te a'u le isi po na ou moe vavale ai, ua ou nofo tata a'e i luga ae o loo ala lo'u tinamatua o loo ula lana tipi Samoa. "O le a lau miti?" o lana fesili lea. "Na ou vaai i ai," o la'u tali lea.

"Vaai i le a?" "I le Nifoloa," o si o'u leo musumusu lea. "E foliga i se sau'ai tele lava, e oomo i totonu ona mata pei se lulu ma lona nifo umi e tasi e pei o le ma'ai o se nila su'i taga popo."

"Na ou fai atu fo'i e fai muamua le lotu, moe ai," o lana tala lea ma faapupusa lava lana tipi, pei e le ano mai.

Tiga la ona ou mata'u i le Nifoloa ma isi mau aitu ae ou te mana'o lava i lo'u tinamatua e faamatala nei tala pe a oo i le taimi e fai ai a matou fagogo. O tala i le aitu o Moso ma Vaea e fai soo. Ae tasi lava se faamatalaga o le Nifoloa ae iloga ona aitua atoa totonu o le ta'inamu. O le po fo'i lena e le misi ai ma nisi e fe'ei tauvala'au. O ina e iloa gofie ai ua ova ma taumasuasua le ipu taufaafefe a le lo'omatua.

O a'u le isi e to'aga e faapipi'i pūpū o le ta'inamu i lau'ulu. O lo'u taofi i lena taimi, e sao mai le Nifoloa i totonu o se pu ta'inamu. Ae le i taitai ona goto le la a ua fo'i mai sa'u tauga lau'ulu. O isi taimi ua faitio tinamatua i le ova o fono lau'ulu ae laiti pu o le tainamu.

E le galo ia te a'u le tala a tinamatua i se mea uiga ese na tupu. Fai mai o se mea moni lava. O le latou nuu sa fai se soo ma le nuu o Falelima. Ona alu lea o le malaga a lo latou nuu i Falelima i Savaii. Na iai se taule'ale'a o le latou aumalaga na ia faia ni amioga e le fa'aaloalo. Peita'i e leai nisi o le nuu na iloina. Ina ua faamavae le malaga ma tagata o Falelima ona faae'e lea le malaga ma toe taliu



e fia maua Salelologa. E le i leva ona alu le loli ae faafuase'i lava le motu ifo o le uluulu o se niu sa tu i tafatafa o le auala, ma lavea tonu ai le taule'ale'a lea ma oti ai.

"E le te'ite'i ua ita fua le aitu, ua ala ona ita ona o le amio a le alii lea," o le sa'i lea a tinamatua. "E le o se mea e ofo ai, na o ia lava lea na oti i le uluulu telē o le niu, ae leai lava ma se tasi na afaina." Na amata mai iina ona ou savali ma autilotilo i luga i ulu o niu pe a matou o e faipopo.

Ua amata nei ona tupu so'u manatu, o aitu a Samoa e le valelea, o aitu a Samoa e popoto, ma se'i vaganā ua tofotofa e le tagata ona lavea lea.

Ua te'a atu aso o le olaga faatama iti ua faasolo ina matua ae le galo le igoa taufaafefe pe a faalaga'i se talanoaga i aitu. Se'ia oo i le tasi aso ae faapea mai le matou faifeau, "Le tatou autalavou, ua uma ona ma fesoota'i ma le susuga a le faifeau, ma ua naunau mai le faifeau e fai sa tatou soo i se aso lata mai."

Na leai se tasi e toe pisa, e o'o lava i le 'au talavou matutua ua gugu uma. Na o le toeaina matua e nofo i le fafine Falelima na tali e lagolagoina le mana'o o le faifeau. Na faapea loa ona fai, ua amata ona fai tapenaga mo le sauni atu i Salafai. Ua lata i le aso e tuuvaa ai a ua le mapu lo matou talatalanoa ma a'u uo i le fauliulito mai o lenei faamoemoe. E pei o se mea e atu i ai, ae le mafai fo'i le naunau atu i ai.

Na iloa e le faife'au lea tulaga ma ia faala'ei'au mai e ala i ana lauga. "E moni e iai tapu a le nuu e tatau ona nofouta i ai, ae to'aga foi e tatalo," o ana tomatau ia.

Na taunuu manuia la matou faigamalaga i Salelologa. Ae ina ua matou taulalata atu i eleele o Falelima, na lagona i tino se mea o loo faamalumalu ifo. Ua atili ai i le itula na matou taunuu ai. Masalo o ao pogisa uma o Savaii nei na faapotopoto ifo i luga o le aai i le taimi lea. E foliga o se fono ati faatopetope o loo fai e aitu o le fanua.

Ua matou fetepa'i ma a'u uo ma ua vave ona tu mai i lo'u mafauafau foliga pau o ata o Dracula ma

lona pulupulu uliuli, e foliga ua faapulou ai nei i matou faapei o manu iti faapo'ia i ofaga.

Ai o le uiga lea o upu faa-Samoa ua pau, ua liligo, auā ua matou lagonaina nei le malu'ia moni ona o le ata o le aitu lea e foliga ua ulu i o matou lagona. Ua ou iloa atu ai faalemafaufau se ata o se aai aitu na ou vaai i ai i se ata tifaga, lea ua matou ulufale i ai.

Na alo le nuu i le 'ava faatali ae fa'aaoga le avanoa e nisi matai e molimoli mai ai i fetalaiga ni fe'au lapata'i, e uiga i le tupua o loo latou iloa a o loo matou taumafai atu e taumate. Na iai se lafoga a se matai o la matou malaga atonu na sala i le faafofoga a se tasi o tamalii, ma faapea mai ai sana upu, "O lena e nonofo mai i tua."

Na vave ona matou malamalama i le uiga o le lafoga, e manino lava. O i matou nei sa nonofo i le talatua ua feliu'a'i ma autilo i fafo.

Ina ua oo i le taimi matou te o ai e ta'e'ele i le vai, na fautua mai tina o le nuu e ta'e'ele filemu ma 'aia le pisa. O se vaaiga e ese ina ua matou taunuu i le vai ma va'aia tagata o loo faamālū e aunoa ni leo, pe so'ona pa'o pe talanoa e pei o aga e masani ai isi nuu i o latou vai ta'ele.

O le aso e sosoo ai na maua ai lo matou avanoa ma isi a'u uo matou te o ai e matamata i le loa o le Nifoloa. O le loa ua gaosia i le sima ma vali pa'epa'e i luma o le fale o le aiga na tausia mai le tupua i augatupulaga. Sa ou matamata ma ou manatu i le fautuaga a le matou faifeau, 'Aua le tofotofa ona faapea o oe o le Kerisiano, auā e usita'i agaga uma i le Atua, e pei fo'i o le Nifoloa.

Na faai'u manuia la matou soo ma le autalavou a Falelima, ua faae'e la matou pasi matou te toe fo'i atu ai i Salelologa. Na faatofa mai a matou uo fou ma faapea mai, 'Aua tou te popole.' A ua ave lea upu ma mafua'aga ua ou toe mafauafau ai i le tala i le loli lea na faamatala e lo'u tinamatua.

Se mea ina 'a malie fo'i. E le i leva ona alu le matou pasi ae oso ane se povi pa'epa'e i o matou luma, pe tusa ma se 100 mita matou te va ai. Ua tu faalava nei i le moa o le auala ma autilo mai. Ua tu fo'i le matou pasi ma tilotilo atu i ai. Ua vave ona toe tutu mai ata o fagogo o na aso i le mafauafau. Ua tatope tatalo musumusu a isi ma autilo i le povi, poo le a le taimi o le a liu ai ia Dracula ma fai ni ona apa'au.

Na taufai mapuea tagata uma ina ua savali ese le povi, ae fa'aauau la matou malaga.

I Kerisimasi ta'itasi, ou te mata'ia ai faatusa o le Aiga Paia i le falepovi. Ma ou mafauafau i le povi pa'epa'e lea na matou fetai'a'i i le ala i Falelima. Ona manino lea o la'u vaai: E uso le povi lea i Falelima ma le povi e faafefe ai tamaiti e le 'aumatutua. O lea lava e tasi na ou to'aga ai i le a'oga a le faifeau, ma tinou e fono i lau'ulu le ta'inamu masae. Lea fai mai le faletua o le matou faifeau, na o lesu e fefe ai. Le tioa a ifo to'ele si alii i lena po na fanau ai le Tupu.

E sa'o lo'u taofi mai le amataga, e popoto aitu a Samoa, e le liu mai i ni aitu 'auleaga e pei o Dracula, ae fa'aali mai i le povi e iloa ifo i lona Matai.

Aisea la e mata'u ai i se povi fa'aaloalo?

Peniata Felise. O se tala leni e faavae i mea moni lava sa tutupu. Ata—D. Callaghan



Meridian Energy ~ Principal Partner

E \$15 le eseeseega mo se tamaitiiti i lenei vaitau tuga



A'OGA SAMOA ONLINE

O e sa'ilia se tautua e fesoasoani i le a'oga a lou alo poo oe fo'i?

MATOU TE OFOINA TAUTUA NEI:

- E lagolago fanau i le atina'e o tomai faavae i le tautala, faitau, tusitusi, malamalama i le gagana Samoa ma le gagana Peretania
- E fesoasoani i soo se tasi o loo fia faalelei ona tomai faavae literasi i gagana e lua
- E fesoasoani i meaa'oga a fanau i le fale pe a tu'ua le a'oga
- E lagolago soo se tasi i le tapenaga o ni pepa mo a'oga, sauni atu i su'ega poo ni fonotaga
- E lagolago polokalame a'oga i mataupu taugagana e lua, ma le silapasi a'oga
- Samoa—Niu Sila ma Samoa
- E fesoasoani i le atina'e o agavaa ma tomai mana'omia o tusitusiga ma su'esu'ega i le kolisi ma le iunivesite fo'i. Ma ni isi fo'i ofo lelei mo oe

Fesoota'i mai loa i le

Telefoni: numera 02102567412; 0210364322

Meli: ola.aogasamoasonline.com; saili.niupac@gmail.com

Poo le Upega Tafa'ilagi: **A'oga Samoa Online**

Tau lava o se minute



I le filemu o le na o se minute:

Matua: O LE MALU E SILISILI

Tusi Faitau: O le mea e te malu ai o le Atua o le faavavau lea; o i ou lalo foi aao o le faavavau. Teuteronome 33 f.27

Tomatau: O le upu a Samoa, a malu i fale e malu i fafo. Ua manino lona faatatau, i le taua o le aiga o se malu o le tagata. A ua manino foi le afioga a le Atua i le malu e sili atu i malutaga uma. Auā e iai le aso e le tali mai ai le malu o le aiga, nuu e o'o lava i malo, ekalesia ma e sa sili le faatuatuaina.

E iai taimi e nofofaalelemalu ai pe a malosi lologa o lu'itau ma faafitaulivale o le olaga. Ona sulufa'i lea i le malu e sili, o lena e foa i le papa, e pei o upu o le pese. O lea na ta'utino ai Mose le ta'ita'i, auā sa ia iloatino lona mamalu ifo i itula faigata o lana savaliga.

Poo fea o le lalolagi tatou te nonofo ai, poo le a lava se mafatiaga o lua feagai, manatua, o iai le malu tatou te sulufa'i i ai, ma mafanafana ai, ma faasaoina ai.

Pese: Iesu ua avea oe ma lafitaga i afa;
E sulusulufa'i i ai, o e ua puapuaga.

Saunia—ETS Uo e to'atolu

NIUPAC PUBLICATION

Email: ola-niupac@gmail.com

Phone: 02102567412

Facebook: [ola—puletini—a'oga](https://www.facebook.com/ola-puletini-a-oga)

Website: www.ola888.com

OLA PULETINI A'OGA

LPSL Tavita, PhD (1st Editor)

ltavita8@gmail.com

Muliagatele Vavao Fetui, PhD

v.fetui@auckland.ac.nz

Salā Saili Aukuso, PhD

saili.niupac@gmail.com

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA acknowledges and defends the rights of other copyright holders whose material we borrow and acknowledge accordingly.

NIUPAC 2011